



DEO OPTIMO MAX.  
UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUODLIBETARIIS DISPUTATIONIBUS  
*manè discutienda in Scholis Medicorum, die Jovis decimâ-octavâ  
mensis Novembris, Anno Domini M. DCC. LVI.*

M. PETRO JOSEPHO-MORISOT DESLANDES,  
Doctore Medico, Præside.

*An ut è Pulmone, sic è Liene sanguis fluidior?*

I.



ANGUINEM omnium humorum qui in circulum moventur, crassissimum rectè dixeris: sani hominis cruor è vasis prorumpens, & humi fusus, in massam scissilem statim concrescit; quasi fluiditatem perosus; solidi corporis indolem affectaret. Quod ne contingat, Natura semper providens irrequieto motu sanguinem torquet, viscosisque ejus moleculis serosas partes intimè miscet. Sic sanguinem vel invirum ad fluiditatem cogit. Id autem in vasis pulmonaribus præcipuè fieri, nemo diffitetur. Crassissimus enim sanguis à toto corpore re-  
dux, ut pote à causâ movente remotissimus, vehiculoque diluente orba-

A

tus, inibi novo cum hospite chylo intimè permisceri amat; partes ejus heterogenæ reciprocè premuntur, pelluntur, conquassantur, atteruntur; sicque canalibus trajiciendis adaptari debent omnia quæ per pulmones fluunt. Nec mirum: sanguis enim in pulmone immediatam experitur cordis actionem, proximumque trunci arteriosi renixum; quo cessante, en novus à tergo hærentem urget cordis impetus. Hoc confirmat autopsia; ter enim & quadragesies velociùs ferri sanguinem per pulmonis arteriolas, quàm per arteriolas musculorum ejusdem animalis, demonstravit Halesius (a). Hinc sanguis è pulmone redux, novâ nitidus juvenat, purpurâque decorus, verè vitalis latex dicitur. An verò parem retinet fluiditatem cruor, qui mox per Portarum venam in hepar propelletur, ibi sanguinis arteriosi munere functurus?

(a) Hales-  
exp. 19; hæ-  
morrhæ.

## I I.

**P**ORTARUM venam arbori similem dixerunt Antiqui, radicibus, truncis & ramis instructam. Radices efformant venarum innumeræ propagines, quæ sanguinem ex visceribus chylopoieticis refluum ad sinum venæ portarum devehunt. Mirabilem hîc metamorphosim cernere est. Venæ Portæ, ad Portas usque, ubi truncum arboris effingit, vena quidem est: at eadem, trans Portas, neque corde salutato, neque pulmonibus, dignitatem & munus arteriæ consecuta, in ramos, ramusculos infinitos & arboriformes per totam hepatis substantiam dividitur. Quot igitur ex hac fabricâ, sanguini per hepar fluenti, neantur moræ? Quot superandi obices? Præterea sanguis venosus qui ex ventriculo, intestinis, mesenterio, omento, pancreate redit, jam à centro motus remotissimus, tot secretiones passus, proindeque diluente vehiculo depauperatus, propior est ut concreseat; aut saltem liquido, artiarum more, secernendo impar omnino foret, nisi præsto adesset machina quæ tantam huic sanguini, quanta est in sanguine arterioso fluiditatem conciliaret. Hæc autem machina Lien est.

## I I I.

**L**IEN in sinistrâ & superiori abdominis parte situs, à diaphragmate pendulus, omento, sinistro reni ventriculoque adhærescens, viscus est molle, pulposum, linguæ bubulæ figuram referens. Coloris est atrorubentis peculiariquè membranâ, à peritonæo oriundâ, instruitur, cujus beneficio prædictis partibus connectitur. Innumeris constans vasorum propaginibus, accipit purum, arteriosum mox à corde expulsum sanguinem ex primâ arteriâ nobili sub septo ortâ, nempe Cœliacâ (b). Lienis autem arteria, splenica dicta, jecorariâ (c) incredibili mensurâ major, per totam ejus excurrens substantiam, mox in minores ac minores ramulos dividitur, ex quibus innumeræ prodeunt venarum radices quæ in unum collectæ, truncum constituunt splenicum; unde in venam Portarum sanguis exoneratur. Multis (d) etiam & magnis instruitur nervis, ab intercostali truncis oriundis; nec desunt vasa lymphatica, at in homine pauciora (e) quàm in brutis.

Structuram autem Lienis vasculosam esse cum Ruyschio asserere non dubitamus, quidquid in contrarium adducat Malpyghius. Liquidò enim demonstravit, ea quæ à Malpyghio dicuntur glandulæ, corpuscula, nihil aliud esse (f) præter vasorum glomeratorum aggeriem. Hinc fabricam Lienis multò quani vulgò creditur, simpliciorē esse attendenti obvium erit. Tota enim in homine ex arteriis venisque constata videtur; sanguisque ab arteriis in venas, directâ propellitur viâ. Nunc quid venæ Portarum sanguini præster Lienis fabrica, situs, moles, vicinia, suspensio, eruere non arduum.

(b) Boett.  
anât. n. 314.

(c) N. 315.

(d) N. 322.

(e) Ruysch.  
de vas. lymph.  
cap. 3.

(f) Thef.  
anât. 7. n.  
31.

**P**ULMONEM inter & Lienem non minima intercedit similitudo. Uterque compressilis, expansilis uterque. Lien, uti Pulmo, emissarium peculiare non habet. Utrique enim pro emissario est vena sanguinem revehens. Quemadmodum autem pulmo totius corporis sanguinis elaborando, attenuando, fuit à Naturâ fabricatus; sic non inanis conjectura est, sapienti pariter naturæ consilio, Lienem comparatum esse alterationi sanguinis bile mox, in hepate, spoliandi; ita ut secundam quasi pulmonis efficiam expariatur, sicque Lien su solius hepatis Pulmo (g). Cruor enim fluidissimus, limphâ dives, nullas interim secretiones passus, mox in arteriam Lienarem è corde sinistro per Aortam, maximo cum impetu, propellitur. Hinc minimos peragrans arteriæ splenicæ ramulos, septi transversæ agitatione, viscerum muscutorumque abdominalium motu, undique comprimitur, attenuatur, in minores ac minores moleculas disceperitur, similiaque ac in pulmonibus patitur. Equis nunc eat inficias sanguinem è Liene regredi fluidiorem; cum aliunde ex arterioso Lienari nihil decesserit? Quibus de causis sanguis ille fluidus, solutus, spiritibus scatens, limphâ luxurians, agrè concrelescens, purpureus, ruber, conficitur, talisque ex hoc viscere per venam Lienarem in Portarum venam, pleno gurgite infunditur; ut oleosum sanguinem ex omento refluum solvat, ex intestinis salino-Alkalinum temperet, atque ex cæteris visceribus crassescentem diluat.

(g) Boerh.  
præl. Acad.  
§. 322.

Nec id ratiociniis evicisse satis sit; nostræ etiam suffragatur sententiæ cadaverum violentâ morte peremptorum attenta inspectio. Si enim, brevi post mortem intervallo, aperiatur cadaver, Lienosus tunc sanguis fluidior floridiorque observatur. (h) Mancas parumvè accuratas in cadaveribus observationes fortè quis objiciet: in promptu ad experimenta in animalibus vivis facta tanquam ad sacram confugiamus anchoram. Si vena splenicâ, inquit Heisterus (i), in cane aliore animali inciditur, sanguinem tenuem, floridum, subtilem effluere & alii & ego sepe deprehendi, nunquam verò crassiorum reliquo sanguine venoso. Huic consentit celeberrimus Fizes (k). Sanguis è venâ splenicâ & ex ipsius ramulis prope splenem educitus, mihi & adstantibus aquè floribus visus fuit ac splenicus arteriosus. Hic suum etiam calculum adjicit Hallerus. Certum est me sanguinem Lienalem nunquam polyposum vidiisse, sed dilutè rubrum, qualis ferè in fœtu est, solum & aquosum; quæ si conferas cum summâ pigmenti sanguinis venæ hemorrhoidalis atque omentalis, suadere videntur attenuationem omnino sanguini in Liene contingere (l).

(h) Fizes de  
hom. Lien.  
san.

(i) N. 212

(k) Fizes de  
Hom. Liène  
sano.

(l) Not. (r)  
in præl. Acad.  
Boerh. §.  
323.

Nostræ etiam sententiæ suffragantur observationes Pathologicae. Dum enim diu noctuque libris impalescunt litterati homines, statimque à pastu ad amata redeunt studia, quiescunt, vix respirant, corpus incurvant ad libros, sedentque immobiles. Ita per varios gradus spissescente Lienis sanguine, feribis oculisvè hypocondriaci fiunt. Quanta tunc ingruat malorum cohors, quot quantisque excrucientur morbis, docet frequentior experientia. Salaces, voraces sunt, mingunt multa & aquosa; flatibus torquentur; augetur, intumescitque hepatis moles; sanguis lentiori motu, per vasa hepatica fertur, stagnant liquida, obstruuntur canales, parciore bilis secreto; unde malorum ilias pullulat. Quin imò in animalibus quibus aufertur splen, præter jam enumerata phænomena, Bilem (m) caeseosam, parcam, immeabilem & æcerimam observarunt Autores. Hinc, quod Pulmo sanguini Aortæ præstat, id Lienem sanguini venæ Portarum tribuere, inconcussum manet.

(m) Valis-  
nerius, Or-  
lobius, Mor-  
gagnus, Pe-  
zizius.

**D**ILUCIDATIS rationum momentis quibus assertionis nostræ veritas comprobatur, illam objectionibus convellere frustra quis conabitur. Quin & novum robur ab ipsis sumet adversantium ictibus. Quid enim sanguinem è Liene spissiore nobis objiciunt, ex eo quòd disseminati per hoc viscus arteriæ rami, mirum in modum contorqueantur, totidemque sint obices quibus sanguis frangitur & in suo motu præpeditur. Verùm, licet in minores ac minores ramulos divisa arteria pulmonaris, mirum etiam in modum contorqueatur, nihilominus tamen fluidior floridiorque est sanguis è Pulmone redux. Nec dicant, sanguinem in circuitu suo per pulmones obeundo, à respirationis actione juvari. Lien inspirationis & expirationis tempore sive à diaphragmate sive à visceribus muscularisque abdominalibus, vi alternâ, jugiter comprimitur. Sanguis, inquit alii, in Lienis cellulis, velut incarceratur, atque per hiantia ubique lymphatica, serosis suis partibus spoliatur. At pauciora sunt vasa lymphatica, nec quæ in interiora penetrent. Saltem, Achilleum videbitur ex solempni experientiâ petitum argumentum. *Animalia secumimus*, inquit, & è venâ splenicâ (n) sanguinem obscurum nigerrimum, & maximè concrefibilem extraximus, dum arteria rutilantem & fluidissimum suppeditavit. Uroque in phialâ transuso, venosum subito concrefcentem, & arteriosum maximè dilutum vidimus. Hæreamus dubitans, si nostrâ dumtaxat nitamur experientiâ, at Boerhaavius, Hallerus, Fixes, Heisterus in experimentis supra laudatis contrarium se se vidisse asserunt. Sic contraria nunc de irritabilitate partium à viris clarissimis circumferuntur experimenta, ita ut, non ut olim in phisicis ratiocinia tantùm ratiociniis objiciantur, sed proferri jam undique incipiunt experimenta experimentis adversantia. Recentiores scilicet ad condendas hypotheses proni nimis, quæ occurrunt in experimentis minùs faventia præconceptæ opinioni, negligunt penitus, vel vi detorquent, sic ut favere videantur. Hinc ratione, experimentis, atque observatione suffulsi concludimus.

(n) Quæst.  
Med. Quæst.  
An sanguis è  
liene spissior,  
1748.

*Ergò ut è Pulmone, sic è Liene sanguis fluidior ?*

### DOMINI DOCTORES DISPUTATURI.

M. Claudius-Josephus Gen-  
sil.

M. Carolus Gillos, Legatio-  
nis Gallicæ ad sanctam se-  
dem Apostolicam Medi-  
cus ordinarius.

M. Nicolaus le Roy de Saint-  
Aignan.

M. Edmundus-Thomas Mo-  
reau.

M. Honoratus Petios.

M. David Vasse, Rei Her-  
baria Professor.

M. Joannes-Baptista Tbu-  
rant.

M. Ludovicus-Anna Lavi-  
rotte, Censor Regius.

M. Andreas-Josephus Sa-  
ron, Regis Consiliarius &  
Rei Tormentaria Medicus  
ordinarius.

Proponebat Parisiis GUILLELMUS BERTHOLD, Salino-Bisuntinensis;  
Saluberrimæ Facultatis Medicinæ Parisiensis Baccalaureus, Theæso  
Auctor, A. R. S. H. 1756, A SEXTA AD MERIDIEM.